

摘藻堂四庫全書薈要

集部

欽定四庫全書薈要卷二萬四百九十四 集部

明詩綜卷二十一

翰林院檢討朱彝尊編

魏 驥 一首

驥字仲房蕭山人永樂乙酉舉人由松江訓導累官南京禮部尚書致仕卒年九十有八諡文

靖有南齋前後集

鄭室甫云公性好吟詠矢口適情不求雕飾自然雋永

靜志居詩話文靖仕宦四十年官階二品年近百齡可稱綱用五福其文極醇雅詩雖非專長

亦頗

蘊藉

### 秋興

秋高風露涼  
明月滿庭戶  
輾轉不能眠  
起縱階前步  
美人天一方  
何時遂良晤  
相思愁中腸  
坐覺年華暮

### 柯暹一首

暹字啓暉一字用晦  
池州建德人  
永樂乙酉年  
十七領鄉薦  
明年預修大典  
尋選入翰林  
知機宜文字  
進元兔詩  
授戶科給事中  
坐言事出知

永新吉水二縣歷官雲南按察使有東岡集

劉上

靜云東岡詩文奇崛出人意表清瑩無滓  
與儉云用晦詩思深沉而幽永  
宋爾章云東

岡詩清淡古雅得  
意處追蹤盛唐

### 九日次黃學士韻

客塗逢九日景物為誰賒此地已無酒故園空有花翠  
微亭下路采石驛邊槎未卜重過日臨風獨歎嗟

### 林真一首

真字汝寔號木菴莆田人遷居閩縣中永樂乙

西舉人以薦選庶吉士侍書經筵出知慈溪江  
寧宜興三縣

粵王臺

屠龍人去幾時歸空有高臺對夕暉回首舊時歌舞地  
年年春草鷓鴣飛

林環一首

環字崇璧莆田人永樂丙戌賜進士第一授翰  
林修撰陞侍講有絅齋集

詩話侍講未第之先縱酒自  
放雖在玉堂詩無臺閣氣

### 題林泉清致

春山佳氣多白雲  
滿芳樹幽徑絕塵蹤  
落花映深戶微  
雨灑林落東風長  
蘭步之子招不來  
滄洲日將暮

陳全五首

全字果之長樂人永樂丙戌賜進士第二授翰  
林編修歷侍講署院事有蒙菴集

詩話果之五  
言專法葦柳

夢遊匡廬山

夢寐遊匡廬，晞髮五老峰。  
長天散氛翳，削出金芙蓉。  
林谷轉深窳，溪迴路彌通。  
澄江波澹澹，霽日花濛濛。  
陰澗長瑤草，陽厓明藥叢。  
樓臺霄漢上，雞犬煙蘿中。  
杳渺逢羽人，相期躡仙蹤。  
覺來玉堂迴，彷彿聞疎鐘。  
丹梯如可接，共汝巢雲松。

送陳廷器歸長樂

置酒新亭上，親賓儼成行。  
蘭肴雜肥鮮，綺席羅瓊漿。  
顧

茲繾綣情樂飲各盡觴中筵忽不懌援琴撫清商絲桐  
易為感離思擾中腸驪歌首前途僕御促行裝故鄉渺  
何許路繞川原長願為晨風翼送子東南翔

送叔韜兄歸長樂

攜手出都門悵然千里心悠悠河橋上送子歸故林川  
原翳象綠灌木澄幽陰滄波渺離思黃鳥鳴好音吾家  
南山下白雲澹遙岑別來幾何時歲月忽已深誓將從  
君歸焉能辭華簪遙持一書札因之南飛禽



挽蘇伯厚先生

寒暑有代謝節序忽蹉跎  
夫子乘運化悽愴將奈何  
生存簪組榮死歿歸山阿  
向來歡娛人零落亦已多  
西日不返照逝川無停波  
懂忽魂若存感慨成悲歌

送人尹江右

窮冬正蕭索離思苦怱怱  
風雨孤帆別琴尊幾日同  
雪晴淮水急雲盡楚天空  
花縣絃歌暇題詩寄塞鴻

謝瑾一首

瑾字庭蘭鄞人永樂丙戌進士除刑部員外郎  
歷郎中出知平陽府遷廣西按察使有蝸濡集

李杲堂云蝸濡集於腐

題爛句中時作驚人語

### 黃陵廟

黃陵帝子昔嬪虞絃斷南薰鳳影孤紅盡淚痕傳翠竹  
青來魂氣隔蒼梧秋風衡岳沉鴻雁暮雨湘江怨鷓鴣  
明月三千年後夜九疑雲冷夢應無

### 曹閻一首

閻字冀成江夏人

一云黃巖人

永樂丙戌進士官監察

### 御史

詩話侍御楚產登科錄可考而謝方石采其詩入赤城集中期東里一篇情致纏綿髣髴謝監

南樓風調

### 期楊士奇不至

羈旅無友生何以慰懷思有客筮適我芳辰以為期深  
叢鳥雀喧窮巷牛羊歸相候清路傍冠佩來何遲我肴  
既云具我酒亦已持雖無德與女寫心良在茲子寧不

我即佇望增歔歎仰觀列宿行羨此明月輝令德衆所慕彼留知為誰諒無好賢誠空負緇衣詩

尹鳳岐一首

鳳岐字邦祥吉水人永樂丙戌進士官翰林侍講

送兄廣東參政應奎

价人藩閩寄旬宣五嶺南行遠著鞭曉日紅亭留別酒  
秋風黃葉下瀧船青連檝攬千家雨黃觸枕榔萬井煙

珍重平生清節在不妨引滿酌貪泉

苗衷一首

衷字秉彝定遠人永樂辛卯賜進士第二累官  
兵部侍郎兼翰林院學士入直內閣進尚書贈  
少傅諡文康

楊思敬東郭草亭讌集

芳春倏云暮暇日鳴玉鞘羣公夙有約駕言適東郊冷  
卿遠相迎會此文字交開筵俯亭沼次第陳觴肴疎花

梁檐前好鳥鳴樹梢  
騰茲百物遂樂飲恣歌嘲

詩話鴻臚卿大興楊思敬築草亭於東郭自正  
統丙辰始歲會文學名流極觴詠之樂自後遂  
為都城飲餞之地西王尚書詩所云柳陰嘶過  
馬花塢駐行車者也其後又於崇文門外十里  
許據渾河之支流有地二十頃以二頃為南園  
鑿塹環之綠以重垣中植桃杏諸果雜蒔花卉  
池種芰荷菱芡退朝邀諸鉅公燕  
集其地則東王尚書有序紀之

錢習禮一首

習禮名幹以字行吉水人永樂辛卯進士選庶  
吉士除檢討歷侍讀學士陞禮部右侍郎卒諡

文肅有應制集詞垣續橐歸田橐

詩話王元美以錢文肅六典文衡為明盛事考  
文肅永樂甲辰業為會試同考官宣德丁未再  
入會場分考而正統丙辰己未兩次殿試皆充  
讀卷官辛酉復為順天主考是主文衡者十次  
矣其詩雖非作家  
然亦無塵空氣

新橋和余檢討韻

初月生遙甸長流遵枉渚方舟沂長河宵分及前侶維  
梢戒孤征懸燈照清語秋衾夢不成隕籜紛如雨

林衡一首

衡字宗器閩縣人永樂辛卯進士御史

賦得江村片雨外送沈空同

片雨江村外霏霏暗去程輕

一作細

沾芳

一作行李

草濕遠入斷煙

輕歸鳥愁邊沒離情別後生不堪凝望處迢遞失闌城

熊槩 二首

槩字元節吉水人永樂辛卯進士榜姓胡除御  
史出為廣西按察使調廣東宣德初擢大理卿  
巡撫兩浙及蘇松諸郡陞南京都察院右都御



史召掌院事兼署刑部事卒於官有芝山居士集

雨後江行

早出餘杭郭微茫曉色開  
畫船江上別綠樹水邊迴  
酒為離人勸詩因細雨催  
故人凋謝久惆悵不勝哀

途中述懷簡張憲副用中李布政昌祺

北闕黃門客南宮粉署郎  
新詩凌鮑謝妙翰繼鍾王  
傑直趨青瑣讐書向玉堂  
遭逢懷聖主眷顧倚儲皇  
超擢

之南越旬宣共一方分符來上苑持節去遐荒  
匹馬炎蒸路雙旌瘴癘鄉豺狼應遁跡恩澤已宣揚  
桂嶺開秦塞蒼梧拓漢疆野人疎制度蠻俗少冠裳  
曉白溪多霧冬青樹不霜四時榕葉暗五月荔支香  
交誼憐君篤鄉情媿我涼別離寧有恨會合豈能忘  
傾蓋酬知己分簪祗自傷明朝故園雨回首思茫茫

杜 桓一首

桓字宗表金華人永樂辛卯進士官趙府紀善

有良菴集

北山草堂和韻

厭彼塵俗喧愛此清幽景  
雨餘山色佳日落松陰冷  
不見草堂人白雲三萬頃

馬鐸一首

鐸字彥聲長樂人永樂壬辰賜進士第一除翰林修撰有玉巖集

送徐主事孟暉回澄江

京華二月柳垂絲送子南行惜別離陌上看山愁對酒  
風前握手倦吟詩雲連鐵甕人煙迴月滿丹陽客權遲  
粉署嚴程應待汝莫因鄉國緩來期

林誌一首

誌字尚默閩縣人永樂壬辰賜進士第二除翰  
林編修歷侍讀有部齋集

菊莊

別業依南山投閒忽成趣白露朝欲晞黃花滿籬戶餐

英慨前修采之恐遲暮苦無三徑資眷此歸來賦

鄭閻一首

閻字公望閩縣人永樂壬辰進士授安陸州學  
正改無為州終廣信府學教授有抑齋集

懷林鴻

寒月照古樹朔風吹城樓如何咫尺居致我千里愁俯  
景暫自遣浩歌誰為酬思君若逝水朝暮長悠悠

陳鎰一首

鑑字有戒吳縣人永樂壬辰進士官至榮祿大夫太子太保都察院左都御史諡僖敏有介菴

### 集

詩話僖敏開濟之才韻語非其所務湯尚書潛菴稱其文有組舞磬控之樂顧遺集罕傳予從其裔孫彥瑜所見之錄詩一首

### 懷慶道中

風卷塵沙驛路迷人家遠近樹高低如何河北風光別  
春半猶無一鳥啼

陳

循六首

循字德遵泰和人永樂乙未賜進士第一除翰  
林修撰累官戶部尚書少保兼太子太傅華蓋  
殿大學士英廟復辟戍鐵嶺尋放還有芳洲集

詩話裕陵復辟吳人盛誇徐元玉社稷之功然  
奪門二字豈可示天下後世李文達之言當矣  
予嘗見少保訟冤疏手彙具陳元王之讒斯亦  
纂國史者所當知也少保詩絕意規摹饒越石  
清剛  
之氣

開平

灤河河北開平府云是前朝故上都萬乘當年供避暑  
孤城此日事防胡龍岡夜照烏桓月鳳輦時巡敕勒區  
何處登臨最愁絕李陵臺上望平蕪

客寓懷來有詔自行在達京師候騰黃不至有感  
往時載筆侍清班玉帳頻先覲聖顏一自病中離闕下  
頓分天上與人間近聞頒詔先歸國久候騰黃未出關  
咫尺日畿誰報喜西風日斷白雲間

野望 二首



遠違車駕踰三月久抱衾裯滯一州南郭幽居嗟影獨  
西風落日使人愁天空絕塞飛鴻度草滿平原獵騎遊  
何似桑乾南下水萬山深處出盧溝

欲就邦人詢往事百年耆舊已無存猿啼暮雨佛山寺  
鶴怨秋風香水園萬仞倚天瓊岫小一泓迸石玉泉溫  
溫水在懷來西北三十里太平自是多耕牧禾黍牛羊日滿村

鷓鴣閣

縣城南面開高閣正俯清江對翠微名勝尚憐如往日

登臨常想到斜暉閣中諸老仍何在水上羣鷗只自飛  
茅屋龍洲終遜此何年重許叩林扉

東軒

半畝溪山舊卜居往來塵跡自應疎春風門巷花開後  
晚閣軒窗日上初頻理琴尊留上客閒攜燈火讀遺書  
時平隱逸皆徵用丹詔行看下玉除

高穀一首

穀字克用揚州興化人永樂乙未進士累官少

傳兼太子太傅工部尚書謹身殿大學士贈太  
保諡文義

送倪廷用致政歸嘉興

青雲遺宦轍白首賦歸田  
舊著宮袍卸新裁野服便  
草堂留月色花徑隔塵緣  
陶令門前柳春來好繫船

牟倫一首

倫字秉常宜賓人永樂乙未進士任監察御史  
以諫謫甘肅

留別京師諸友

行行策馬去皇畿  
落木高原獨鳥飛  
天上故人青眼在  
蜀中諸弟素書稀  
秋風故隴雲連棧  
夜月清笳霜滿衣  
白髮蕭蕭身萬里  
不知別後竟何依

鄭珞一首

珞字希玉侯官人永樂乙未進士選庶吉士改授刑部主事出知寧波府有訥菴雞肋二集

送高時旭還閩

祖帳連芳草征帆挂夕曛鄉心閩海月客夢楚江雲候  
館雞聲早平沙鴈影分懸知霄漢上早晚薦雄文

陳輝一首

輝字伯煒閩縣人永樂乙未進士任貴州按察  
司僉事陞廣西副使有琴邊清唱

旅次武林期叔剛修撰不至

寓宇閔幽寂羈懷轉淒其況茲梅雨候值此麥風時閒  
登溪上樓悵望吳天涯長風卷潮來倏忽銀屋移潮水

尚有信我行豈無期緬懷同心人惻然起遐思

周敘一首

敘字功敘吉水人永樂戊戌進士改庶吉士授編修歷修撰侍讀陞南侍講學士有石

溪集

送袁欽誠

少壯辭家去從師千里遊雨深廬岳樹天接漢江流夜誦分漁火朝吟倚客舟遙知重會日春滿帝

王州

金誠一首

誠字誠之番禺人永樂戊戌進士授工部主事  
改刑部有集

江行

一作王佐一作董良  
史今從韓迪粵音

江水悠悠江路長孤鴻啼月有一作帶微霜十年踪跡渾無

定莫更逢人問故鄉蔣仲舒云可仿唐人渡桑乾之作

黃閨一首

閏字期餘信豐人永樂戊戌進士有竹居集

擬唐人長安春望

一作安福  
謝復古詩

南山晴望鬱嵯峨上苑春遊玉輦過天抱帝城雙闕迴  
日臨仙杖五雲多鶯聲盡入新豐樹柳色遙聞太液波  
漢主離宮三十六樓臺處處起笙歌

宗子相云全  
是盛唐風調

晏

鐸一首

鐸字振之富順人永樂戊戌進士改庶吉士授  
福建道御史以言事謫上高典史有青雲集

李時



遠云振之詩溫柔

易詩經  
卷二十一

典麗自是作家

詩話振之采明初詩為鳴盛集惜未之見花月  
金陵十四樓之句盛傳於時或云在宣德十才  
子之列今其詩存者甚少格調平平僅與海寧  
三蘇伯仲按俞憲登科考名在永樂十六年李  
騏榜三甲第三十五人何出光蘭臺法鑒錄稱  
是永樂十三年進士十五年由庶吉士授福建  
道御史巡按兩京畿山東以建言謫上高典史  
吾鄉沈孝廉德符野獲編謂是永樂二十二年  
庶吉士傅開異辭當以登科考為正也黃才伯  
撰翰林記謂永樂甲辰科庶吉士不可考題名  
止書四人其一乃復乃壬辰進士王道方懋德  
甲辰登科錄並無其人兪州別集載六人野獲  
編云其實二十人然六人之外所增益者如劉  
濟張觀乃壬辰榜周安乃乙未榜沈善李敬木

訥曾泉盧璟及鐸乃戊戌榜萬碩王璉乃辛丑榜初疑孝廉偶誤及閱劉文安所撰劉實傳稱實從周學士功敘學書經用以舉進士時宣宗皇帝方隆儒術合前科丁未是科庚戌後科癸丑進士共選得二十八人比列宿數以先朝選士未嘗若是也然則合先後數科同選庶吉士實始於永樂間矣孝廉熟精學故日讀一寸書考證極詳是非亦不謬惜其書未刊行於世

### 九峰山行

曲徑沿流上下蒼苔白石磷磷落日唯聞啼鳥空山更

### 少行人

劉鉉 一首

鉉字宗器長洲人永樂初以善書徵入翰林中

庚子舉人授中書舍人陞兵部主事擢翰林侍

講累官少詹事卒贈禮部左侍郎諡文恭有假

菴集

李原德云劉公詩古澹春容自有餘味  
吳原博云文恭著作不以險怪為工往往

於和平簡澹之中寓溫純典雅之意  
文徵仲云公為詩一字不安更數月必改定其矜慎若  
此

### 送杜亞卿赴南京

一尊傾罷雨瀟瀟  
客思離情總未消  
廿載禁林同侍講

五更青瑣共趨朝  
西風鴻雁南歸急  
落日雲煙北望遙  
此際送君無限意  
蕭疎楊柳玉河橋

曾鶴齡一首

鶴齡字延年泰和人永樂辛卯賜進士第一歷  
官南京翰林院侍講學士有松臞集

羅知州之交趾分韻得北字

惆悵杯酒間  
踟躕路側通  
別情所難況  
君遠行客行  
客適何許南  
交乃絕域山  
川阻且修  
匹馬獨登陟  
丈夫

四海志萬里猶咫尺辛苦諒不辭所思在明德俯視川  
從東仰睇星拱北還朝會有期側竚聽消息

薛

瑄二十一首

瑄字德溫河津人永樂辛丑進士除御史歷大  
理少卿累進禮部左侍郎兼文淵閣大學士卒  
諡文清從祀孔廟有河汾集

蔣仲舒云文清以  
理學名其詩則非

宋調

詩話文清讀書錄專以宋儒為師其詩有云吾  
意六籍外尚多古人書一朝秦燹烈焚蕩無遺

餘撮拾煨燼者補綴誠區區此間固已多盡信  
寧非愚獨有屏聖心昭哉難弱如多謝宋諸老  
萬世開迷塗宜於詩亦宗擊壤矣而集中五言  
醇雅有陶孟韋柳之風予嘗謂宋之晦菴明之  
敬軒其詩皆不墮宋人理趣未見有  
礙於講學又何苦而必師擊壤派也

擬古 二首

孤桐生龍門縻絲出東國相合為素琴不離君子側清  
彈何悠揚遺音為發越中涵千古心養彼至人德云胡  
變新聲哇淫日淪惑舉俗逐時好誰能稱在昔萬事亦  
復然不獨琴與瑟

庭竹生涼飈明月從東上候蟲草根鳴夜靜聲愈響逍  
遙步階除悠然起遐想三皇五帝時淳朴竟焉往王風  
降黍離禮樂委榛莽反覆千載間雜霸迭相長是非垂  
不泯勝負在俯仰令人意難平揆置聊自廣

古詩二首

水火非無功焦溺亦由此君子得其操小人迷所止四  
海豈不遙發軔良自邇薰風愜民心黃竹蕩人耳善惡  
反手間胡不慎其始

七百卜公旦萬世期咸羸豈不同所願天道有虧盈岐  
山麟鳳集函谷虎豹爭趨舍乃如此大運焉得并蓬萊  
舟始泛博浪車已驚遂使三秦士不獨驪山坑已笑勿  
復言九宇皆炎精

秋日雜詠 二首

庭樹生秋風微涼入衾枕久客得無思遠意復誰論道  
腴足充餐天和可當飲以茲撥離憂僻好安所稟大義  
自古來旋覆吾已審



翻翻高荷葉秋雨生微涼豈不懷遠道撫時坐空堂何  
以為我懽簡策多遺芳古人不可作古道不可忘茲理  
將無墜欲語墮渺茫安得忘言子相與傾一觴

答趙彬

美人生南國艷色世所稀明眸一回顧草木生光輝我  
行重嗟惜便欲攜同歸贈以青玉案貢之黃金扉如何  
久契闊此念將無違

雜詠

古劍匪新器古瑟匪新音雖無適俗態知己在所尋  
充子佩服美感子淡泊心韞匱固有待無悶良可欽

游習家池

谷口一逕入蒼山四邊開中有習池水水碧無纖埃  
泉源初噴薄交流遂滌洒飛鳥鏡中度行雲天外來  
微風一蕩拂林影久徘徊寒光空心性俯翫何悠哉  
愛此不能去載歌寫中懷

游君山寺

為愛湖中山遂尋山下路取徑彌幽遐涉澗亦回互石  
磴足莓苔青林雜煙霧前行如有窮嵐嶺乍分布招提  
歷重湖千里周一顧孤峰四無垠形氣自依附山僧復  
導我窈窕更徐步疎籬野蔓懸老圃寒泉注逕轉山房  
深重與絕境遇白雲檐外生清風竹間度庭花雜無名  
歲晏色猶故澄心得妙觀忘言契良晤愛此林壑清遂  
薄塵俗務重來待何時尚子早嫁娶

渡雙溪

雙溪始合流，厓渚遂經復。洄潭一鏡平，秋影空寒綠。野  
渡得孤航，山家帶喬木。適意方自茲，前呵戒童僕。撫景  
重悠然，誰能和斯曲。

東平行臺有竹翳於惡木，荒草命僕芟治，嘉植乃  
遂。詩以紀之。

生平苦愛竹，義若君子交。茲軒忽見之，俄頃漆在膠。振  
衣步其下，周覽增鬱陶。惡木一何多，蔓草一何饒。翳此  
破苔筍，撓彼凌雲梢。命僕恣翦伐，得辭斤斧勞。除惡貴

絕本蘊崇及溝壕荒穢既了了涼風亦蕭蕭修莖遂生  
植嘉蔭愜游遨作詩紀顛末庶為同心謠

穆陵關

危哉穆陵關高出衆山頂地勢愈覺寬天宇相迴迴林  
木何蕭森首夏風色冷山樓試一登眺覽恣遐騁沂岱  
環西陰淮海接南嶺齊州走北川扶桑控東影道里會  
一門山川挈要領緬思千古前豪伯互吞并齊履空復  
然秦蠶已侵境干戈被長蠶生民困魚鼎於今天道旋

四裔守安靜山行晝悠然水宿夜無警  
顧我觀風人符節得屢秉作詩紀茲行  
傳與山將永

瀘川古意

三蜀古名郡瀘川古名州我來值殘暑  
偶此數日留新秋忽改節涼風漸颭颺  
逍遙散前除仰視天宇周征鳥去不息  
白雲亦悠悠佳人渺何許重林蔽層丘  
秋日復西邁大江自東流良辰不我與  
古道曠莫酬願聞瑤華音行矣旋吾輶

褒斜道中

褒斜一何長，深谷自迤邐。雲木青無邊，羣峰各峻峙。鳥道緣崖顛，危棧駕江涘。冥冥叫子規，泱泱響溪水。累日山峽中，陟降亦勞只。自我入蜀門，今逾一年矣。既乏督辦能，兼負素餐恥。而況鬢髮蒼，胡寧不知止。上章乞解綬，詔許感不已。雖云此谷險，且遂北歸喜。

過徐州

去年春正月，南泛彭城舟。今歲值秋暮，北上邈長流。蹤

跡信往復景物愜觀遊風寒堤柳落波減岸石稠白見  
高城堞蒼出遠山丘何處戲馬臺彷彿燕子樓化遷無  
停軌事往不可求陳迹竟泯泯虛名但悠悠覽今亦懷  
昔發聲遂成謳

苦雨

涼風颭颭雨聲急出門跬步苦沾濕山城拂地雲霧深  
河渚交流潢潦溢田夫野婦坐歎息園中有棗不可食  
況復離離禾黍垂及時不得收地力一年百事望秋成



秋成奈此淫雨積誰哉為我誅雲師宛見青天行白日  
久雨遣懷

秋來常苦雨風氣早生寒小鳥投林急高鴻下食難奔  
流淹古道密霧隱前山試誦停雲句中懷獨未寬

武陵曉泛

今朝風日好來泛武陵溪碧水寒依岸蒼林遠護堤沙  
光搖野馬人語散鳧鷖二月桃花發還應處處迷

黔陽山中

景好寧知是異邦竹籬茅舍枕蒼江吏情更有山林趣  
綠樹門前畫戟雙

竹枝歌

錦官城東多水樓蜀姬酒濃消客愁醉來忘却家山道  
勸君莫作錦城遊

于謙十三首

謙字廷益錢塘人永樂辛丑進士除山西道御  
史擢行在兵部右侍郎罷為大理寺少卿景陵

踐阼拜兵部尚書加少保英宗復辟棄市成化

中贈太傅諡肅愍後改諡忠肅有集

陸子淵云于公

有社稷功其詩亦足冠冕時輩夏時正云公

詩文多至千篇皆真撫餘聞車馬道途寄興之

作及秉邦政不復經心所見僅一二爾語皆自

胷次流出思親戀闕憂人及物眷眷不忘溢於

言表

詩話少保社稷之臣其詩特多秀句如風來疎

牖銀燈暗月轉高城玉漏遲紫塞北連沙漠去

黃河西統郡城流野花偏向愁中發池草多從

夢裏生千里逢人俱是客十年持節未還家鳥

飛不過巖頭石人渴難尋澗底泉風約閒雲難

作雨渠分流水不成河坑頭炙炭燒黃鼠馬上

彎弓射白狼天外青山圍故國雨中黃葉下空  
潭皆意態自然不煩雕琢其論詩曰詩豈易言  
哉發於心形於歌詠盡乎人情物變非深於理  
而適於趣則未易工也觀其持論造詣深矣

### 自歎

我生四十餘已作十年客百歲能幾何少壯難再得今  
朝太行南明日太行北風雪敝貂裘塵沙暗金勒寒暑  
互侵凌凋我好顏色齒牙漸搖脫鬚髮日以白位重才  
不充況此遲暮迫早賦歸去來庶免清議責

### 暑月將自太行巡汴

三晉衝寒到中州  
冒暑回山川元不改節候  
自相催綠樹連天  
暗丹葵向日開  
太行雲縹緲搔首意徘徊

遊春

滿路香塵起尋春思欲迷  
樹晴鶯出谷溪暖燕銜泥  
玉勒嘶芳草青樓瞰大堤  
風光無限好都在畫橋西

春日大風感懷

遠塞足風沙春深不見花  
層冰猶度馬弱柳未藏鴉  
易醉愁邊酒頻歸夢裏家  
凭闌一搔首心緒亂如麻

除夕夜坐感懷

秉燭焚香坐不眠，夜長難到五更天。  
懷人此際隔千里，為客明朝是十年。  
遠道風霜今老矣，故園梅柳想依然。  
椒盤獻歲知誰共，獨把深杯對影傳。

秋風

蕭蕭入夜動清商，披拂園林草木黃。  
快意埽除天下熱，何人吹送枕邊涼。  
荻花楓葉愁江渚，蓴菜鱸魚憶故鄉。  
萬里碧天雲散盡，衝開征雁不成行。

偶題

倦鳥投林處斜陽在樹枝薄雲收未盡山雨乍晴時

春夜

長風送華月照我庭前樹宿鳥忽驚飛雙雙背人去

平陽道中

楊柳陰濃水鳥啼豆花初放麥苗齊相逢盡道今年好  
四月平陽米價低

上太行

西風落日草斑斑  
雲薄秋容鳥獨還  
兩鬢霜華千里客  
馬蹄又上太行山

夏日憶西湖風景

湧金門外柳如煙  
西子湖頭水拍天  
玉腕羅裙雙蕩槳  
鴛鴦飛近采蓮船

暮春客途即景

雨中紅綻桃千樹  
風外青搖柳萬條  
借問春光誰管領  
一雙蝴蝶過溪橋



擬吳儂曲

憶郎直憶到如今誰料恩深戀亦深刻木為雞啼不得  
元來有口却無心

劉球一首

球字求樂更字廷振安福人永樂辛丑進士授  
禮部主事改翰林侍講以忤王振矯旨下獄死  
景泰初贈翰林學士諡忠愍有兩溪集

李時遠云忠愍

金春王映如月瑛  
天犀人共寶之

山居

水抱孤村遠山通一徑斜不知深樹裏還住幾人家

陳叔剛

叔剛名振以字行閩縣人永樂辛丑進士官翰

林修撰遷侍讀有絅齋集

錢原博云侍讀詩沖和聽麗諸體各極其妙

松坂

亭亭萬松林別構僅容膝席陰無冬春簾翠自朝夕主人愛松風靜聽意自適清吟到夜分明月在中鳥是非

曠不聞煙霞已成癖我有小山謠期君謝閒逸黃鶴遊  
青冥汗漫不可即

萬節一首

節字資中安福人永樂辛丑進士除知榮昌縣  
入為御史遷廣西按察副使有雪坡集

漁村夕照

獨槩村西漁艇重門樹底人家夕照平蕪遠近小橋流  
水橫斜

張

楷 三首

楷字式之慈谿人永樂甲辰進士授江西道御

史出為陝西僉事轉副使擢都察院右僉都御

史有和唐集

徐子元云式之和唐所謂服亮之服惜其自作殊不快意 蔣仲舒

云中丞遍和唐詩可謂捧心效

顰究其才致亦一時之彥也

詩話中丞和唐不獨律詩踵韻而已至歌行古風并上句亦和之同時餘姚陳贊維誠亦然登黃鶴者必廣崔顥之章宴滕王者必仿子安之體人雖至愚不愚於此矣其在閩提督軍務除夕作詩云亂離何處覓屠蘇濁酒三杯也勝無又云除夜不須燒爆竹四山烽火照人紅為言

者所劾而罷此殆非和韻詩宜  
其中禍後舍和韻不復作也

漢宮曲

日暮上簾鉤春花壓翠樓忽聞宣召急羅帕掩篋篋

江南曲

忽得三巴信郎歸未有期只言風浪險不是薄情兒

江南春

滿川啼鳥怨殘紅水郭春園柳絮風春雨一番江水闊  
草痕將綠到吳中



明詩綜卷二十一

總校官庶吉士臣張能照

校對官檢討臣龔大萬

謄錄監生臣朱懷玉



欽定四庫全書薈要

集部

明詩綜卷二十三



詳校官編修臣王天祿

欽定四庫全書薈要卷二萬四百九十五

集部

明詩綜卷二十二

翰林院檢討朱彞尊編

佑 十二首

佑字宗吉錢唐人洪武中以薦歷仁和臨安宜陽訓導升周府右長史永樂間謫戍保安洪熙乙巳赦還有存齋樂全集香臺百詠

靜志居詩話明初詩家以楊廉夫為祭酒廉夫見同調綴以評語不曰牛鬼則曰狐精此王常

宗論文即以狐比廉夫也宗吉幼為廉夫所賞拾其唾餘演為流派劉士亨馬浩濶輩爭效之譬諸画仕女者肌體癡肥形神猥俗會牛鬼狐豸之不若矣其稍有風骨者如射虎何年隨李廣聞雞中夜舞劉琨蹈海莫追天下士折腰難事里中兒庶與凌彥紳李宗表相近當時嘗取宋元金三朝律詩一千二百首編為鼓吹續音惜乎不得見矣

### 天魔舞

承平日久還宇泰選伎徵歌皆絕代教坊不進胡人旋

女內廷自試天魔隊天魔隊子呈新番似佛非佛蠻非

蠻司徒初傳祕密法世外有樂超人間真珠瓔珞黃金

縷十六妖娥出禁籞滿圍香玉逞腰肢一派歌雲隨掌  
股飄飄初似雪迴風宛轉還同鴈遵渚桂香滿殿步月  
妃花雨飛空降天女瑤池日出會蟠桃普陀烟消現鸚  
鵡新聲不與塵俗同絕技頗動君王覩重瞳一笑天回  
春賜錦捐金傾內府中書右相內臺丞袖無諫章有曲  
譜天魔舞筵宴開駝峯馬乳黃羊胎水晶之盤素鱗出  
玳瑁之席天鵝擡彈胡琴哈哈迴吹胡笳阿嚕來羣臣  
競獻葡萄杯山呼萬歲聲如雷天魔舞不知危高麗女

六宮妃西番僧萬乘師回紇種類皆台司漢兒回避南  
人疑天魔舞樂極悲察罕死博囉歸鐵騎驟金刀揮九  
重城闕煙塵飛一榻之外無可依天魔舞將奈何多藏  
金巨羅急駕白雲駝陰山之北避兵戈

春社詞

十日一風五日雨社前拜祝神已許瓦盆湫澁斟濁膠  
高俎縱橫薦肥豕鳴鳴笛聲坎坎鼓俚曲山歌互吞吐  
老巫狡獪神有靈傳得神言為神舞祭餘分肉巫自與

醉裏狂言相爾汝小兒覓餅大兒扶頭上神花付鄰女  
高門歎

高門成高門壞不及十年見成敗獸鏹移去屬何人重  
構高門臨要津門前牢栽楊柳樹莫被他人又移去

義士行

鍊金鑄范蠡買絲繡平原逝者恐無知徒用勞心魂  
矣哉烏江八千軍壯矣哉海島五百人任安念舊不改  
轍豫讓報讎須殺身酒不必澆劉伶墳上土劍不必挂

徐君墓前樹感君恩重死相從冥漠重泉有逢處

看燈詞 六首

東家砍竹縛山棚西舍邀人合鳳笙官府揚文初出了  
今宵喜得晚來晴

銷金小繖揭高標紅藕青梅滿擔挑依舊承平風景在  
街頭吹徹賣錫簫

傀儡裝成出教坊綵旗前引兩三行郭郎鮑老休相笑  
畢竟何人舞袖長

風簾珠翠動紛紛笑語聲喧隔戶聞  
明月滿街天似水不知何處著行雲

文錦坊西後市南鬪竿挑過百花籃  
少年游子誇輕俊拾得雙頭碧玉簪

村裏兒童暫入城隨羣齊上大街行  
歸來徹夜渾忘睡從此春田嬾去耕

清明

兼旬蹭蹬在京華又見東風御柳斜  
客裏不甘佳節過



借人亭館看梨花

過蘇州

白蓮橋下暫停舟  
垂柳陰陰拂水流  
舞榭歌樓俱寂寞  
滿天梅雨過蘇州

偶桓九首

桓字武孟太倉衛人  
洪武中應秀才舉為崇安  
從事授桂林河泊大使  
終荆門州吏自有江雨

軒集

王元美云吏目頗協  
風格故多鴻爽之詞

詩話明初詩家採選政者賴良直卿許中憲仲  
子劉仔有汝躬沈箕士傅王傅孟敬皆有所蔽  
惟瞎牛乾坤清氣一編能開生面惜予所  
鈔閱七言近體絕句未得全書恒以為憾

雜詩二首

衡茅日岑寂嘉樹生繁陰夙興挹朝爽翛然澄我心如  
彼倦飛鳥冀得棲故林抱經味遺言且復理鳴琴惜哉  
鍾子沒曠世誰知音

養疴卧丘樊庶得脫塵鞅三徑日就荒行樂倦還往荆  
榛既蕃蕪荼蓼亦滋長幽蘭獨憔悴况復纏草莽不因

馨香發豈獲君子賞

早發灤江亦同舟戴伯貞

夜泊南熏亭曉上白石潭北風颯以爽蕭蕭動征衫灤  
水激沙礫挂嶺浮煙嵐顧此道里修遙遙在天南常恐  
瘴厲惡三年情不堪今晨始得歸灑然脫塵凡况遇同  
袍友高歌酒初酣搔彼頭上雪短髮各鬢髮相顧但一  
歎往事悉已諳林泉在何處為我洗餘慚

夜渡郎官湖

夜渡郎官湖波影忽動蕩搖搖泛孤舟  
軋軋打雙漿天闊星自流山黑月未上  
何處虎牙關令人起遐想

赴夷陵

迢迢上夷陵意促日易暝亂石剗馬蹄  
叢棘冒衣領登山若攀天度壑如赴井  
撫膺欲嘔心喘息屢延頸但逢過虎跡  
篋絕行人影顧茲客懷惡况乃道里永  
毫素難具陳聊以述短詠

秦文仲授溧陽教諭賦此贈別

淮海秦徵士鬢鬢雪滿顛五年三拜詔十日九朝天自  
許償詩債誰能與酒錢冷官歸更好不負舊青氊

送陳民初歸廣州兼問訊趙知事公傑

靜江遙帶五羊城官舸乘風畫鷁輕客館鄉人秋送別  
高齋弟子日相迎枕椰接葉蠻煙暗螺蚌含珠海月明  
到郡為詢賢贊府幾時鞍馬定朝京

趙王孫墨羊圖

王孫長憶使烏桓因念蘇卿牧雪寒落盡節旄無復見

寫生傳得兩瓶看

王孟端墨竹

鳳池退食寫琅玕  
醉墨淋漓尚未乾  
寄贈故人良有意  
清風日日報平安

謝

縉五首

縉字孔昭吳人有蘭庭集

張繼孟云孔昭詩憤  
戚而不傷和悅而不

流可謂得性情之正

詩話孔昭画入能品予嘗見其山水真蹟華亭  
董尚書稱為勝國名流然其詩集刊於永樂中

汝南周傳浚儀張肯序之卷末有送盛啟東還  
吳詩并寫雲陽早行圖以贈題云永樂丁酉十  
月徐用理選其詩入湖海  
香英集不得謂之元人矣

### 修竹塢訪蕭隱士

草堂寂寞西澗坳  
隔林犬吠聲寥寥  
幽人無事不出戶  
送客有時還過橋  
溪上斜陽立將盡  
莎間細路歸仍遙  
明朝秋風桂花發  
卧穩東山誰見招

### 春思

簾幕風微篆有香  
起來時候已斜陽  
梨花雲冷不成夢

蛺蝶一雙飛過牆

寄王廷桂

山連罨畫雲烟好  
路入苕溪水木清  
如此江南好風景  
故人何事不歸耕

寒食村中

流水涓涓映淺沙  
石林風急亂啼鴉  
荒村寒食無人到  
何處香來積穀花

漫興



村村昏黑樹陰濃  
只尺湖塘路不通  
夜半風來雨吹散  
擢歌依舊月明中

趙迪四首

迪字景哲懷安人自號白湖小隱有鳴秋集五韻

言云景哲興洽  
情真固是逸才

詩話景哲五古學唐人而得其丰韻三玄遠遜  
之不知當日何以不列十子之目愚山據二徐  
氏辯景哲非山人其實不然福州林孝廉佶獲  
徐興公所藏鈔本鳴秋集有景泰五年迪仲子  
壯後序中云先人值時多故投老林泉而同時  
閩人鄭閩公望鄭閩公啟郭厘敬夫均有輓鳴

秋山人詩則宜陽人官吏部侍郎賦元夕應制  
詩者自是別一人矣壯懷安人中宣德十年鄉  
試官南海知縣  
具載閩省賢書

### 題浦舍人梧竹圖

吾懷出塵想飛思凌滄洲湘江夜來雨寒色川上浮涼  
飄金井夕露滴銀塘秋故人隔千里對此空離憂

### 幽人獨憩圖

幽人遺世氛心與浮雲薄薜蘿寒可衣山泉時自濯白  
雲林下來黃葉衣上落高風不可攀逍遙在林壑

山水圖

蘇耽昔隱處落日惟孤雲青山丹竈前摘井香氤氳湖  
光林際斷嵐氣霞外分仙源不可即清思徒紛紛

周青士云

頗近  
常建

殘雨

黃陵日已昏蕭颯涼颼起殘雨挂空江冥濛若千里

郭 厓 二 首

厓字敬夫福州人有鏡湖清唱

徐興公云敬夫吾鄉隱君子百

年來罕有知者其趣青鋪嶺絕句云家林想在  
空濛外一帶螺江隱翠微又有門前湖白與山  
青分攜空過白湖亭之句其所居當在  
白湖螺浦之間與趙景哲相鄰竝也

### 懷鳴秋先生之京

澄江晚悠悠離思杳難極西風鴻鴈飛我憶鳴秋客遠  
樹帶餘暉前川起寒色即此待歸舟沙頭埽苔石

### 送友之京

我正愁寥落君今又北遷春歸萬里外人去五雲邊塞  
柳迎征旆江花照別筵離情不可道去住各悽然

鄧林一首

林初名觀善字士齊新會人洪武丙子以明經  
中鄉舉官南昌教授擢吏部驗封主事文皇改  
名林後坐法戍保安遇赦晚居杭州有湖山游  
詠錄退菴集

二月九日大駕北巡賦詩紀事

虎衛三千士龍旂十二辰  
兩京嚴古制六載重時巡  
宿雨開新霽青陽屆仲春  
鍾山浮王氣輦路動香塵  
河岳

提封舊車書制度新覃恩深似海過化速如神壽域熙  
民物貞符叶鳳麟太平無以報願效華封人

沈山子云  
初唐遺塗

平顯二首

顯字仲微錢唐人以薦授廣西藤縣知縣謫戍

雲南沐黔國延為西席

朱宗海云仲微浙長江  
徑洞庭道夜郎謫昆

其為歌詩怪變家  
故得於遠遊之助

題丁野夫画

野夫已沒四十載化鶴歸來知是非郭外梅村更地主

筆端松石見天機一時好手不可遇  
千古賞音如此稀  
長憶西湖舊遊處  
画船秋雨白鷗飛

光霽堂

碧雞翠鴻濛夕影到滇水  
月出金馬東徘徊白雲裏

施

敬

十一首

敬字孟莊錢唐人謫居滇

詩話孟莊詩頗清越句如斜日黃留漁浦樹隔  
江青度海門山鷓鴣蹋翅黃竹葉翡翠啄破蒼  
苔花天吳拔斷蛟龍尾月露洗出珊瑚枝夕陽  
靄靄衆山暝秋水迢迢雙鷺明茱萸綠深江路

草枇杷黃盡  
客窗枝均有風致  
若歸燕一首疑是感葉徐而作

送吳文學東還

結歡未云久  
詎盡平生語  
執手臨路隅  
離觴聊一舉  
殘鐘草堂夕  
落雁蘆洲雨  
相憶渺天涯  
深悰若為處

題梅德芳杏林圖

梅仙煉丹處  
山杏栽無數  
賣藥到人間  
衣裳帶紅霧  
花開不知歲  
子落還成樹  
我欲與之言  
飄然騎虎去

送人還廣陵



會面情方洽，睽違意更長。  
天涯同是客，秋杪各還鄉。  
黃葉飛揚子，青山繞夜郎。  
分襟卽萬里，相顧兩茫茫。

歸燕

已知秋社近，更繞画梁飛。  
主意豈不念天時，難獨違雙  
歸遼海，遠對語夕陽，晞花雨重來。  
日故巢，還是非。

送譚孟端

蘼蕪葉齊春水生，故人欲歸傷吾情。  
草堂酒盡落花滿，山驛馬嘶殘月明。  
醉中執手不忍別，路上逢人須寄聲。

明朝相望隔關塞  
惟見白雲天際橫

己陽夜泊

獨擢三巴夜  
秋高片月孤  
灘聲將客夢  
萬里下東吳

貧樂軒

長卷束牛腰  
簞瓢繫牛角  
讀書深樹中  
不知山日落

塞上曲

八月秋高塞草斑  
將軍千騎獵前山  
彎弓不射南飛雁  
恐有征人附信還

南行途中寄錢唐親友

萬里移家入瘴烟故鄉音耗若為傳  
衡陽自古無來雁  
况去衡陽又八千

漕溪夜泊

空山孤驛鼓逢逢明月流輝滿大江  
水鳥夜寒棲不穩  
一雙飛影過篷牕

讀程原道昆陽詩悵然有懷

昆陽市上美人家飲酒曾停過客車  
萬里相思不相見

東風吹盡蜜檀花

劉叔讓一首

叔讓揚州人

詩話叔讓題正南門城樓云紅樹一村蒲旬晚  
黃雲滿地楚田秋秋夜述懷云南詔羈棲傷短  
髻東湖寥落憶扁舟  
蓋亦明初徙滇者

憶弟

漂泊嗟吾老羈遲見汝難  
西風鴻雁急落日鵲鴿寒  
渭北書長絕滇南淚不乾  
相思朝夕夢懷抱幾時寬

陸

顥 一首

顥字伯瞻揚州興化人洪武中舉明經官戶部  
員外郎永樂初與修太祖實錄奉使朝鮮有頤  
光集

吳江道中

鱸肥尊脆正秋風綠水紅橋宛轉通不獨季鷹思故里  
扁舟吾亦戀吳中

李孝謙

七首

孝謙名本以字行鄞人與弟悌謙洪永間相繼  
舉孝廉皆以母老固辭有中林集

詩話孝謙悌謙忠謙兄弟三人皆有至行其父  
仕開統於貨時會稽胡舜咨金華戴叔能錢唐  
楊彥常曹南吳主一豫章揭伯防先後游四明  
仕間招致賓館俾諸子問業故其詩文有法孝  
謙撰長律英華度  
有可觀惜其不傳

### 題畫

青天際遠水落日明遙岑奮袖拂蒼石憩此長松陰涼  
颺灑露頂正可絃吾琴古調詎自祕坐惜無知音美人

隔秋水望望烟波深何當一相晤曠焉諧素心

題柴昆陵越山春曉圖

君莫著謝公登山屐更莫問子猷泛雪舟請君試看高  
堂壁仿佛李白天姥夢中遊於越山川甲天下秦關蜀  
道皆土苴柴侯晚年天機清酒酣潑墨為予寫天姥高  
出東南天天台四明相蟬聯影落平湖一鑑淨正對賀  
老山莊前近山青青遠山小烟霧冥濛漲春曉雲門日  
出似聞鐘耶溪樹綠應啼鳥鳥啼不可聞林深不見雲

只疑空青四山合，倏訝飛瀑雙崖奔。極知妙手奪天造，  
真宰上訴天應笑。獨脚山魃作鬼精，偷向靈巖拾奇草。  
水竹江花何處灘，漁郎翠蓑露未乾。青帘酒家石橋右，  
樣舟却憶姚江干。長松之下一片石，竹杖芒屨二三客。  
脫巾高挂白雲邊，醉倚青天翠如滴。

送徐允迪還城中

寒梅照虛牖，嚴霜凋弊裘。故人動歸興，歲晏不可留。  
徐卿立身何坦蕩，行年五十猶偃仰。不思唾手取公卿，却



甘低頭在草莽市中賣藥能逃名杖頭挑錢還解醒悲  
來不作窮途哭時復有詩鳴不平忘年之交古來有臭  
味相同即為偶來遲去疾奈爾何無限離情付杯酒北  
風吹雨凝作花船頭敲冰船尾划道傷行人指歸路城  
上棲鳥還到家城市塵埃易更改還念山林青眼在看  
花有約明年來教我村童埽門待

送巽上人還台州

挂錫遙憐野寺鐘赤城何處問芙蓉歸心千里月千里

行色一重山一重霞洞春深多藥味石橋雲斷少人蹤  
秋風紅葉挑花似此日相期谷口逢

新秋寄德鄰

一雨兼旬水沒塍江村涼思陡然增鴻來燕去非迎送  
扇故衣新豈愛憎遠戍有書終可到小樓無賦且須登  
不知明日還晴不船過湖南聽采菱

寄題黃巖張氏隱居

天台佳氣鬱龍蔥中有留侯暮赤松繞屋溪聲長落水

對門雲氣悉成峰  
果林秋熟猿將子  
藥圃春肥鹿長茸  
幽討莫辭行路遠  
穿雲已辦一枝筇

題畫

溪頭春水碧粼粼  
溪上春山絕點塵  
不信白雲都占盡  
也應茆屋有閒人

李悌謙 三首

悌謙名未詳亦以字行

擬古

驅車前送君送君長亭道落日照道周君行何草草結  
交既已晚相去一何早世路多險巇君身詎能保別時  
春草深於今已枯橐思君衣帶寬憶君容顏老

春社

今日報春社風光處處同社公三日雨花信幾番風野  
老還祈穀村醪可治聾醉歸茅屋卧花月淡朦朧

八月廿夕起東軒步月

今夕何夕耿無眠攬衣起聽更漏傳中秋能隔幾夜遠

明月已減三分圓  
雲開數雁影帖地  
露冷獨鶴聲徹天  
心情未覺坐來倦  
挑燈更讀離騷篇

尤安禮一首

安禮字文度吳縣人建文元年舉於鄉官至貴州布政司參議

詩話少參為高士敏方希直所取士樹屏歸田人罕見其面况太守鍾入覲揚東里詢其起居鍾無以應東里曰公為守土吏乃不識尤文度耶鍾歸訪之見一老絡絲巷中布衣紉屨環堵蕭然鍾欲割官地益宅謝不可遣以金亦不受鄉人至今傳為美譚其遺文尚存韻語特少送

人從軍一篇雖乏警句然唐名家作古詩亦有如是而止者

### 送人從軍

秋風正搖落游子遽離羣  
結髮事戎行遠戍驃姚軍  
悠悠歲月邁渺渺川涂分  
何以慰心曲努力樹功勳

### 錢安二首

安字靜能後以字行鄞縣人  
臨安訓導遷韓府紀善  
永樂改元聞其名召至京  
因以老辭放還

### 有睦東集

李杲堂云紀善詩健撲有蒼然之色

舟中遣懷

朝發浙江頭暮宿越城下  
寒月照船窗清霜肅原野  
豈不念別離吾道有用舍  
俛仰宇宙間孤懷浩難寫  
強取囊中琴起彈仍復罷  
悠悠世上人誰是知心者

喜晴

秋風忽起卷重陰  
日色微茫照樹林  
野老扶藜看白石  
山人伐木度青岑  
門前溪水深三尺  
牆外竹梢高十尋  
明日甕頭新酒熟  
且依松下一開襟

鮑仁濟 二首

仁濟字原弘黃巖人永樂初伊府紀善有怨菴  
集

絕句

月移階上花露滴階下樹四顧寂無人流螢自來去

燈下有述

白頭紀善病艱難一點青燈坐夜闌千里恐驚親骨月  
紙書猶自報平安



林 枝一首

枝字昌達閩縣人號古平山人有效顰集

詩話閩自十才子外能詩而不與其列者有趙  
迪景哲林紹淳裕鄭文霖汝衆林敏漢孟陳本  
叔因及昌達也昌達集不傳徐興公家有老  
儒手錄明初詩今歸林孝廉佶予借觀錄之

寄彭韞玉

空齋牢落思寥寥  
荏苒年光逝水消  
憶得當時分袂處  
柳花如雪過江橋

劉 績七首

績字孟熙紹興山陰人隱居不仕人稱西江先

生有嵩陽集

顧玄言云孟熙會稽名家屬興豪華才思雄健

詩話殘雪未消雙鳳閣新春先入五侯家晚唐張翥詩也孟熙易殘以霽易新春以春風攘為已作遂以此得名人或少之然竹影橫斜水清淺挂香浮動月黃昏非江為詩乎林君復易疎暗二字竟成千古名句所云一字之師與活剝生吞者有別也張作全詩不稱不若劉之首尾相當其自題詩本云幼小工刺繡極知絨綫難祇緣花樣古不耐俗人看是時人爭學溫李宜其以拔俗為嫌耳

題西陵送別圖送姚進士

悠悠復悠悠  
風吹江上舟  
今朝天色好  
送客西陵頭  
西陵在何許  
冪歷春郊樹  
搔首望行人  
迢迢上京路  
京路一千程  
官梅照眼明  
春風濃似酒  
難浣別離情  
離情餘幾日  
佇得君消息  
折取杏園花  
慰我長相憶  
相憶夢相仍  
高樓只自登  
春潮知我意  
日夜向西陵

送周明德應詔之京師

閭門柳條未堪折  
只宜相見不相別  
別人生蹤跡各東西  
半是車輪與馬蹄  
把酒送君城北路  
曉日鴉啼烏柏樹

一聲歌罷淚沾巾  
僮僕催人上塘去  
願為轆轤纏青絲  
轆轤可轉心不移  
男兒出處自有分  
與君那得不相離  
官家有程行莫緩  
後夜相思月還滿

送友人歸番陽

芳草綠尚淺  
故園春未殘  
平生為客慣  
今日別君難  
短檝吳歛曲  
哀絲楚女彈  
江花正滿眼  
且莫下長干

送王內敬重戍遼海

別淚不可忍  
杯行到手空  
風塵重作客  
寒暑易成翁  
曙

色連關樹秋聲起塞鴻天涯見親友還與故園同

早春寄京師白虛室先生

帝城佳氣接烟霞草色芊芊紫陌斜霽雪未消雙鳳闕  
春風先入五侯家歌鐘暗度新豐樹游騎晴驕上苑花  
獨有揚雄才思逸應傳麗句滿京華

結客行

結客千金盡酬恩一劍存羞為狗盜伍不倚孟嘗門

月夜獨坐憶錢唐進師房聽施彥昭摘阮

忽思吳客四條絃  
出谷新鶯咽洞泉  
一曲醉翁何處聽  
冬青樹底佛堂前

鄭嘉一首

嘉字原亨紹興山陰人時稱柿莊先生

秋日懷孟熙

故人丘壑隱塵路  
往來遲寒暑空相憶  
雲山不可期  
古碑梅福寺荒井石郎祠  
舊日同游處偏勞入夢思

趙宗文二首

宗文名文以字行長洲人官鄱陽知縣有慎獨

齋集

詩話趙叟傳詩不多率清穩可誦其題金山寺  
云淮海西來三百里大江中湧一孤峰凌厲無  
前惜乎全  
詩不稱

送姜公實還汝陽同知是日飲餞至曉始別

酒醒江館夜燈微故舊殷勤不忍違孤擢近從滄海發  
一官獨向汝陽歸雲開遠浦青山曉霜落空江野樹稀  
明日相思成兩地西風愁見塞鴻飛

清明道中書懷

東風道上亂開花  
游子偏驚見物華  
寒食已過嗟在客  
春衣將換憶還家  
山城樹暗人逾靜  
野店鶯啼日未斜  
空約同游與諸弟  
今朝猶自各天涯

陳靖遠

一首

靖遠南昌人

姑惡行

芳池月陰春草碧  
有鳥有鳥鳴不息  
千聲萬聲道姑惡



新婦低回淚痕落  
姑惡姑惡姑不惡  
努力牕前勤織作  
嗟爾小鳥胡不思  
新婦會有作姑時

錢遜一首

遜字謙伯紹興山陰人  
洪武末以薦授寧夏提  
舉水利吏目永樂初遷  
知孟津縣改弋陽坐累  
戍交趾復官文昌主簿  
有謙齋集

春詞

紅杏蕭牆翠柳遮  
重門深鎖屬誰家  
日長亭館人初散

風細鞦韆影半斜  
滿地綠陰飛燕子  
一簾晴雪捲楊花  
玉樓有客猶中酒  
笑撥沉烟索煮茶

何澄一首

澄字彥澤江陰人  
建文元年舉人  
永樂初歷官  
袁州知府

題畫鴈

蘆花瑟瑟水茫茫  
落月沉沙夜未央  
離思不禁天外鴈  
孤舟燈火客三湘

吳鎮一首

鎮字稽陽吳江人

重過沙河有感

白鶴沙頭水自波  
扁舟曾載夕陽過  
東風一路縻蕪綠  
添得春愁別後多

陳觀一首

觀字思賢南海人

詩話明洪永間有四陳觀一不知何許人中洪武辛未進士一中洪武丁丑進士福建永福人

一中洪武庚午舉人字子潤富陽人一南海人  
字思賢子潤初筮為廷平教授調黃州升國子  
助教力請補外改武昌教授再調荊州初克應  
天同考試官再為江西福建考官調荊州後又  
為江西福建考官致仕後復起為應天同考試  
官掄文六次居教職五十餘年洵異事也陳少  
保循志其墓稱誨諸生之暇輒為詩文以應四  
方之求及引年歸日與故舊賦詠為樂惜其詩  
傳者罕矣九日登高一律南皮李  
時遠云是南海陳觀之作今從之

### 九日陪李上猶登高

百年能幾遇重陽  
遂伴登高引興長  
邑宰喜陪元亮飲  
參軍那似孟嘉狂  
山雲映水搖秋色  
浦樹含風送晚涼

滿路黃花應笑我白頭猶自客他鄉

董儒一首

儒字大賓鄱陽人

四明夜泊

孤城臨野戍短檝倚江橋客路辭家久親闈入望遙斷  
雲晴後樹明月夜深潮感此無窮恨令人倍寂寥

吳子恒一首

子恒豐城人寧海縣丞有雪厓詩集

詩話子恒詩一卷其曾孫巡撫雲南都御史祺  
刊行秀水陶照華容孫繼芳臨海趙淵零陵楊  
村皆為之序有弟叔淵中永樂丙戌進士仕至  
浙江按察僉事及卒子恒哭以詩云出任應同  
歲歸休又共年又云介壽周花甲為官歷四朝  
則其卒在正統間也又有八旬自述詩云天與  
遐齡八十秋六旬老矣得歸休蓋歸田廿載後  
乃沒攷之南昌台州二府志皆不載其人詩雖  
欠工趙淵稱其不出位不狎物若  
老人整巾體貌自別因存其一絕

### 高洲

青山西峙水流東  
暘谷縈紆一道通  
老去相知一藜杖  
天邊扶我最高峰

錢復亨 二首

復亨松江華亭人蕭山儒學教諭有講餘集

魏仲

房云復亨詩清而

不枯華而不豔

蘇臺懷古

闔閭城柳幾春風山遠臺高望眼空  
麋鹿不來人亦去  
鷓鴣啼處是吳宮

題画

娟娟涼風斷復連青山深處藕花邊  
誰家樓外停歌舞

# 又上西湖十錦船

詩話西湖船製不一以色名者有明玉鎗金金勝寶勝大綠間綠游紅申屠仲推詩紅船撐入柳陰去釋道原詩水口紅船是妾家是也形名者有龍頭白樂天詩小航船亦画龍頭是也形有鹿頭揚廉夫詩鹿頭湖船唱報郎是也形色雜者有百花十樣錦錢復亨詩又上西湖十錦船是也以姓名者有黃船董船劉船見吳自牧夢梁錄蓋大者謂之頭船最大者賈秋壑所造車船也車船棚上無人撐駕但用車輪脚踏而行其速如飛小者謂之瓜皮船廉夫詩小小渡船如缺瓜歐陽彥珍詩瓜皮船子送琵琶張大本詩瓜皮小船歌竹枝周正道詩瓜皮船小水中央是也又有總宜船取東坡居士淡妝濃抹總相宜之句名焉李宗表詩總宜船中載酒波



凌彥紳詩幾度湧金門外望居民猶說總宜船  
是也四水潛夫述武林舊事值探春競渡日画  
橈擲比如魚鱗無行舟之路揚謹思詩大船揭  
鼓銀酒缸小船吹笛紅繡窗今則敗舫數艘無  
復徵歌按舞者矣

蔡庸一首

庸字惟中紹興山陰人

徐氏席上聞歌有感

休遣雙鬟唱竹枝聽來渾不是當時自從夢隔巫山雨

言觥得秋風宋玉悲

詩話惟中與留孟熙唐愚士毛鼎臣齊名時號  
唐留毛蔡席上聞歌一絕宛然劉夢得杜牧之

音道

鄭

關四首

關字公啟閩縣人有石室遺音部齋集

暇日南湖莊上

門逕絕車塵惟聞沙鳥語誰識忘機人  
山間坐朝暮南風吹雨來颯爽溪頭樹  
白鷗知我閒相看不飛去

題秋江送別圖

美酒雙玉壺沙頭送行客  
瑟瑟荻花風寒江秋水白落  
日下長空返景明石壁去去入烟霞  
相思楚天隔

輓任本立

陸沉誰分聖明朝老向窮途  
怨未消荒冢已無行客弔  
歸魂徒有故人招臨風短笛  
腸空斷落月空梁夢漸遙  
從此不須頻北望嶺猿江樹日蕭蕭

竹枝詞

十二灘頭水接天  
千山陰雨萬山烟  
自從前路風波惡

不敢回頭望別船

朱琳一首

琳字玉林號雨椿嘉興人

雨中過韶州

船下韶瀧日欲晡  
四山雲起漸模糊  
沙鷗衝浪頻來往  
汀樹迷烟半有無  
作客又驚三月暮  
思家其奈一身孤  
愁懷結轡渾如醉  
獨倚篷牕聽鷓鴣

曾一本一首

一本南昌人

挽屠指揮

一別驚淪沒空遺大樹陰  
愁枯雙淚眼交絕百年心  
瘴海連天闊黃茅過嶺深  
料應魂未返悵望獨長吟

李進 三首

進字孟昭嘉興人永樂初聘為府學訓導有西

園先生集

高念祖云吾鄉少傅俞公山為孟昭弟子西園先生集五卷少傅子誥所

刊也以校官兩應省闈之聘其在闈則永樂庚子也其在山東則癸卯也海鹽李孟璿志墓稱

其居喪哭母眇一目而廬陵陳方序其集稱其  
詩清麗工緻變態不一錢唐姜蓉塘亦極稱之  
詩話孟昭鐵松居士懷用和士林詩選取以歷  
卷句如杏花村裏青旗酒揚柳隄邊画鷁船三  
月東風初去鴈一番新雨又飛花菰蒲風外  
呼漁艇揚柳陰中認酒樓均有晚唐人風致

### 花游曲

飛花入簾宮漏長游絲落絮春茫茫金鞍駿馬青絲勒  
綺閣小姬紅粉妝黃金作丸落花底啼鳥隔花飛不起  
明朝更欲載東風早買湖船放春水

### 同陳劉二掌教游湖作

湖光瀲灩鳥間關  
小擢夷猶意獨閒  
春正好時初過雨  
望中佳處惜無山  
花明遠岸青旗出  
柳拂微風画舫還  
四美由來俱不易  
人生莫遣髻毛斑

西湖夜泊

蹇驢衝雪岸烏紗  
夜醉西湖賣酒家  
十六吳姬吹鳳管

卷簾燒燭看梅花

姜明叔云  
蘊藉風流

謝

矩一首

矩字元規鄞人有鳴窮集

賦望郎回山

望郎回望郎不回心欲推化作山頭一拳石質堅不朽  
心不灰花開花落秋復春竽然獨立誰與鄰夜深惟見  
皎皎月雨晴只有英英雲將心誓比雲與月雲有卷舒  
月圓缺百年夫婦終古心豈辨新離與故別此心炯炯  
天地知山高水深終相期郎君應有歸來時

姚 黼 一首

黼字廷章嘉興人處士有可閒集



寄景伊文學

憶昨逢君四月初  
笑談懷抱最相符  
朝乘白下看花騎  
暮醉長安賣酒壚  
別去江山頻悵望  
歸來松菊未荒蕪  
登臨日候南飛鴈  
肯寄平安一紙無

張 璨 二首

璨字蘊之 岷縣人

詩話蘊之取材  
選體古意猶存

君子有所思行

騁駕向名都縱觀極西京煌煌九衢裏列第起朱甍虹  
梁架層漢暈閣度紫清高槐蔭金溝弱柳垂雕檻前揚  
許史鑣後曳金張旌燕姬撫瑤瑟趙女彈鳴箏歡娛豈  
終極為樂擬千齡清川去悠悠白日光易傾金谷歎綠  
珠上蔡悲蒼鷹繇華會當歌大運有虧盈勿嗤黔婁室  
寂寞掩柴荆

婕妤春怨

太液柳垂絲昭陽花滿枝如何長信草獨是得春遲

項 伍 一首

伍字如僉温州瑞安人

秋江送別為戴友諒賦

蕭蕭落葉早寒天  
忽送秋聲到耳邊  
千里客心驚歲月  
五湖鄉夢入風煙  
青山紅樹還家路  
綠水滄洲載酒船  
夜半燈前對兒女  
白頭頻話謫居年

明詩綜卷二十二